

吉水縣志卷之三十一

藝文志

劄子目錄

宋

薦王安石呂公著劄子

歐陽修

箋目錄

宋

謝皇太子頒賜誠齋二字箋

楊萬里

傳目錄



宋

六一居士傳

歐陽修

皇清

趙氏五節婦傳

翁方綱

策目錄

宋

文天祥

明

胡廣

劉儼

彭教

羅洪先

劉同升

書目錄

宋

答李如圭先生論註儀禮集釋書 朱子

答曾無疑書 朱子

明

與安南辨明邱溫地界書 陳誠

與行在戶部諸公書 周忱

復卻金書

張祥

與劉櫟亭四府論水次書

羅洪先

與臺省諸公論覈丁書

羅洪先

又論覈丁書

羅洪先

答何吉陽都憲書

羅洪先

與朱鑑塘論清軍書

劉應秋

皇清

爲文折二鄉士民復李少司馬書

徐元發

復王明府與本邑除荒減賦書

李振裕

與王思繩明府爲本邑兵米改撥京口書

李振裕

與吉水王明府書

李振裕

吉水縣志卷之三十

吉水縣知縣長沙周樹槐纂修

藝文志

劄子

宋

薦王安石呂公著劄子

歐陽修

臣伏見陛下仁聖聰明優容諫諍雖有狂直之士犯顏
色而觸忌諱者未嘗不終始保全往往亟加擢用然而
用言旣難獻言者亦不爲易論小事者旣可鄙而不足

爲陳大計者又似迂而無速效欲微諷則未能感動將直陳則先忤權貴而旁有羣言奪於衆力所陳多未施設其人遽已改遷致陛下有聽言之勤而未見用言之效頗疑言事之職但爲速進之階蓋緣臺諫之官資望已峻少加進擢便履清華而臣下有厭人言者直云此輩務要官職所以多言使後來者其言益輕而人主無由取信臣以謂欲救其失惟宜擇沈默端正守節難進之臣置之諫署則旣無干進之疑庶或其言可信伏見殿中丞王安石德行文學爲衆所推守道安貧剛而不

屈司封員外郎呂公著是夷簡之子器識深遠沉靜寡言安石久更吏事兼有時才會召試館職固辭不就公著性樂閒退淡於世事然所謂夫人不言言必有中者也往年陛下上遵先帝之制增置臺諫官四員已而中廢復止兩員今諫官尚有虛位伏乞用此兩人補足四員之數必能規正朝廷之得失裨益陛下之聰明臣叨被恩榮苟有所見不敢不言取進止

箋

宋

謝皇太子頒賜誠齋二字箋

楊萬里

玉字寶書賜一雙之白壁槿籬茅棟騰千丈之瑞光自
媿野人恭承嘉惠某申謝茲蓋伏遇皇太子殿下學闕
百聖天縱多能於兩宮問寢之餘傳二聖揮毫之秘龍
盤虎卧得精妙於太皇霧結雲霏憲昭回於今上某敢
不刻諸琬琰垂厥子孫袖有驪珠函山川之輝媚家無儋
石藏星斗之文章

傳

宋

六一居士傳

歐陽修

六一居士初謫滁山自號醉翁旣老而衰且病將退休於潁水之上則又更號六一居士客來問曰六一何謂也居士曰吾家藏書一萬卷集錄三代以來金石遺文一千卷有琴一張有棋一局而嘗置酒一壺客曰是爲五一爾奈何居士曰以吾一翁老於此五物之間是豈不爲六一乎客笑曰子欲逃名者乎而屢易其號此莊生所謂畏影而走乎日中者也余將見子疾走大喘暍死而名不得逃也居士曰吾固知名之不可逃然亦知

夫不必逃也吾爲此名聊以志吾之樂爾客曰其樂如何居士曰吾之樂可勝道哉方其得意於五物也泰山在前而不見疾雷破柱而不驚雖饗九奏于洞庭之野閱大戰於涿鹿之原未足喻其樂且適也然嘗患不得極吾樂於其間者世事之爲累者衆也其大者有二焉軒裳珪組勞吾形於外憂患思慮勞吾心於內使吾形不病而已悴心未老而先衰尚何暇於五物哉雖然吾自乞其身於朝者已三年矣一日天子惻然哀之賜其骸骨使得與此五物偕返於田廬庶幾償其夙願焉此

吾之所以志也客復笑曰子知軒裳珪組之累其形而不知五物之累其心乎居士曰不然累於彼者已勞矣又多憂累於此者旣佚矣幸無患吾其何擇哉於是與客俱起握手大笑曰置之區區不足較也已而歎曰夫士少而仕老而休蓋有不待七十者矣吾素慕之宜去一也吾嘗用於時矣而訖無稱焉宜去二也壯猶如此今旣老且病矣乃以難彊之筋骸貪過分之榮祿是將違其素心而自食其苦宜去三也吾負三宜去雖無五物其去宜矣復何道哉熙寧五年九月七日六一居士自傳

皇清

趙氏五節婦傳

大興翁方綱

吉水城北趙氏一門五節婦爾基妻曾氏基從兄
弟爾圭妻蕭氏爾堅妻曾氏爾堂妻郭氏圭同母
弟爾臺妻龍氏也爾基有能文聲然試輒不遇抑
鬱死曾氏守志四十餘年無子其女弟爾堅妻有
子旣授室矣子婦皆蚤卒曾氏守志三十有五年
蕭氏生子發銘五月而爾圭卒守志三十有一年
發銘邑庠生爾堂妻郭氏年十八歸於堂越六年

堂卒與諸姒事姑尤謹哭夫與姑至失明亦無子
郭氏守志三十年而與蕭氏兩曾氏同被

旨旌其閭爾臺妻龍氏嗣亦旌云趙氏家傳云先是吉
水城東解氏者一門五節婦故時人爲之語曰趙
若解婦之楷論曰明桐城鍾氏一門四節婦時人
稱之曰四節里今吉水趙氏以五節稱於古罕臻
焉故於斯傳無溢辭以俟史氏

吉水縣志卷之三十一

吉水縣知縣長沙周樹槐纂修

藝文志

策

宋

文天祥

臣對恭惟皇帝陛下處常之久當泰之交以二帝三王之道會諸心將三紀於此矣臣等鼓舞於鳶飛魚躍之天皆道體流行中之一物不自意得旅進於陛下之庭而陛下且嘉之論道道之不行也久矣陛下之言及此